

deffunct, conduit par monsieur de Chevières, tous quatre ayans de grands manteaulx à longue queue traynans par terre.

Après eulx venoient messieurs de la Justice et gens tenans le siège présidial à Lyon, leurs huysiers marchant devant, et en après le peuple, en si grande multitude et foule, qu'il seroit impossible de les nombrer, et parce qu'il falloit une grande estendue de chemin pour ranger tout ce que dessus, l'on fut contrainct d'aller faire le tour par la rue de Flandres, jusques au puy du Sel, et revenir par dessus devant ladicte église Saint-Pol, et de là au Change; puy droict en ladicte grand église de St-Jehan, où l'office de la grand messe fut faict fort solennellement par monsieur l'archevesque de Vienne, et l'oraison funebre par M. Amond Auger jesuiste, lequel print pour thème ce verset : *In memoria eterna erit justus, ab auditione mala non timebit*. Discourant sur lequel il n'oublya rien qui peult faire à la louange du deffunct, ayant recherché ses actions dez qu'il fut sorti de page, et continué par degrés et par année jusques à son décès, et entre aultres, il n'oublya la bataille de Renty, où ledict deffunct avoit vaillamment combattu; ses faits et gestes en Piemont, le passage qu'il feist en Italie sous feu monseigneur de Guyse, le soing qu'il avoit eu à conserver son gouvernement en repos, et d'en chasser tous ceulx qui le pouvoient troubler; comme il avoit faict au pays de Forests; le bon devoir qu'il avoit faict devant la Mure, lorsque monseigneur de Mayenne la tenoit assiégée; bref il rapporta toutes les actions et faits héroïques dudict deffunct.

Après ceste oraison, la messe parachevée, après laquelle et les *exaudi* et autres suffrages accoustumées, le corps fut porté à la sépulture par les habitués de ladicte église qui l'avoient prins des mains desdicts penitens à l'entrée du cloistre d'icelle, lesquels penitens après que toutes les cérémonies accoustumées en tel cas eurent esté dignement faictes et parachevées, allerent bailler de l'eau beniste au corps et chanter sur icelluy ung *de profundis* en musique; de là le dueil retourna conduit comme dessus au logis dudict deffunct, duquel Dieu veulle avoir l'ame. Le lendemain duquel on eust advis comme le roi avoit baillé ledict gouvernement de cette province à monseigneur duc de Nemours et la lieutenance en son absence à monsieur de Botheon, seneschal dudict Lyon, dont tous les gens de bien ont reçu un très grand contentement et en a ladicte ville très humblement remercié sa majesté.

1466. ». Louis XI, par lettres-patentes en date de ce jour « donne ordre que
« l'art et ouvrage de faire des draps d'or et de soye soit commencé